

MAVZU: TARJIMAYI HOLLARNING YOZILISH TARTIBI VA O'ZIGA XOS XUSUSIYATLARI

Reja:

1. Tarjimayi hol haqida umumiy ma'lumot
2. Tarjimayi holning yozilish tartibi
3. Tarjimayi holdan namunalar yozish

TARJIMAYI HOL

"Tarjimayi hol" so'zi hozirgi o'zbek tilida "o'z hayotini yoritish" ma'nosida qo'llaniladi. Ya'ni tarjimai hol ma'lum bir shaxsning o'z shaxsiy hayoti, mehnat va jamoat ishlaridagi faoliyatining bayonidir. U birinchi shaxs tomonidan mustaqil tuziladigan hujjat hisoblanadi.

Tarjimayi hol, asosan, oliy o'quv yurti, kollej va akademik litseylarga o'qishga yoki biror bir muassasa, tashkilot yoki xo'jalikka ishga kirishda, shuningdek, siyosiy tashkilotlarga a'zo bo'lib kirish oldidan yoziladi. U boshqa rasmiy hujjatlarga nisbatan erkin tuziladi. Shuning uchun har bir shaxsning hayot yo'li singari tarmijai holi bir-biridan farq qiladi.

Tarjimayi hol quyidagi zaruriy qismlar asosida yoziladi:

1. Hujjatning nomi (Tarjimayi hol)
2. Tarjimayi hol matni ("Men" olmoshi bilan boshlanadi). Uning tarkibida quyidagilar qayd etiladi:
 - a) familiya, ism va ota ismi;
 - b) tug'ilgan sanasi (yil, kun, oy);
 - v) ijtimoiy kelib chiqishi ;
 - g) mustaqil oilali bo'lsa, faqat ota-onasi haqida qisqacha ma'lumot beriladi (uylanmagan yoki turmushga chiqmagan bo'lsa, aka-ukalari haqida ham ma'lumot berilishi mumkin);
 - d) ma'lumoti yoki ma'lumotiga ko'ra mutaxassisligi (qayerda va qachon o'qigan yoxud o'qiydi);
 - e) qachon, qayerda, qaysi vazifada ishlagan;
 - yo) oxirgi ish joyi va lavozimi;
 - j) mukofot va rag'batlantirishlar;
 - z) jamoat ishlaridagi ishtiroki;
 - i) siyosiy tashkilotlarga a'zoligi;
 - y) oilaviy ahvoli va oila a'zolari;
 - k) turar joyi
3. Hujjat yozilgan sana.
4. Imzo.

Tarjimayi hol oddiy qog'ozga, ba'zi o'rinlarda (o'qishga, ishga kirishda) maxsus bosma ish qog'ozlariga ruchka bilan yoziladi.

Muallifga tegishli bo'lgan ma'lumotlar davriylik asosida qayd etiladi. Tarjimayi hol shunday yozilishi kerakki, u bilan tanishgan kishi muallifning hayot yo'li, ishga qobiliyati, mutaxassisligi bo'yicha mahorati, ijtimoiy-siyosiy faoliyati haqida to'liq tasavvurga ega bo'lishi lozim.

Tarjimayi hol

Men, Fayzullayev Alisher Bahodirovich, 1998-yilning 20-aprelida Surxondaryo viloyati Termiz shahrida xizmatchi oilasida tug‘ildim. Otam — Fayzullayev Narzulla, Termiz davlat pedagogika institutida o‘qituvchi, onam — Karimova Salima savdo tizimida sotuvchi bo‘lib ishlaydilar. Opam — Fayzullayeva Gulnoza maktabda o‘qituvchi bo‘lib ishlaydi. Akam — Fayzullayev Shuhrat — Samarqand iqtisodiyot va servis institutining II kurs talabasi. Ukam — Firdavs 7-sinfda, ukam — Jahongir 2-sinfda o‘qiydilar.

2005-yildan 2014-yilgacha Termiz shahridagi 7-maktabda, 2014-yildan 2017-yilgacha Termiz davlat universiteti qoshidagi 2-son akademik litseyida o‘qidim. litseyda sinf devoriy gazetasi muharriri bo‘ldim. Kimyo va biologiya fanlariga juda qiziqaman. Matematika fani bo‘yicha viloyat olimpiadasida g‘olib chiqdim.

Litseyni tamomlagach, 2017-yilda Termiz davlat universitetining Kimyo va texnologiya fakultetining “Kasbiy ta’lim (engil sanoat buyumlari konstruksiyasini ishlash va texnologiyasi(tikuv buyumlari))” yo‘nalishiga o‘qishga kirdim. Hozirda universitetning uchinchi kurs talabasiman. Fakultet va universitet jamoat ishlarida faol qatnashaman. “Yoshlar ishlari bo‘yicha agentlik” a’zosiman.

Bo‘ydoqman.

Mening turar joyim: Termiz shahri, Tamaraxonim ko‘chasi, 5-uy

2020-yil 5-sentabr (imzo)

A.Fayzullayev

Topshiriq

1. Tarjimayi hol yozishda qanday ma’lumotlar haqida axborot berasiz?
2. Tarjimayi hol qachon va qayerda talab etiladi?

1-mashq. Tarjimayi holga xos so‘z va so‘z birikmalarini daftaringizga ko‘chiring, ularning ma’nolarini bilib oling. Ular ishtirokida gaplar tuzing.

Xizmatchi oilasida tug‘ildim, ishchi oilasida tug‘ildim, dehqon oilasida tug‘ildim, bo‘lib ishlaydilar, maktabni tamomladim, o‘qishga kirdim, lavozimida ishladim, taqdirlandim, qatnashaman, a’zosiman, bo‘ydoqman, uylanganman, turmush o‘rtog‘im, saylanganman, jamoat ishi.

2-mashq. Yuqoridagi Tarjimayi hol matnidan quyidagi ma’lumotlar bilan bog‘liq gaplarni toping va daftaringizga ko‘chiring:

a) tug‘ilgan joyi va vaqti haqida; b) o‘qish faoliyati to‘g‘risida; v) ota-onalar to‘g‘risida.

3-mashq. *Ijtimoiy kelib chiqishi* va *ijtimoiy ahvoli* ifodalarining ma’nolarini tushuntirib bering. Ijtimoiy kelib chiqishingiz va ijtimoiy ahvolingiz haqida daftaringizga yozing.

4-mashq. Quyida berilgan gaplardagi sinonimik yaqinlikka e’tibor qiling. Siz ularni qaysi holatlarda qo‘llaysiz?

Meni "Milliy tiklanish" partiyasi a'zoliciga qabul qildi. — "Milliy tiklanish" partiyasi a'zoliciga qabul qilindim. Harbiy xizmatga ketdim. — Harbiy xizmatga chaqirildim. Faxriy yorliq bilan taqdirlashdi. — Faxriy yorliq bilan taqdirlandim.

5-mashq. Uslubiy qo'llanilishiga ko'ra sinonimik-juftliklarni ikki ustunga bo'lib yozing.

Hozirgi vaqtda — hozirda, yoshlar tashkiloti iltimosiga ko'ra — yoshlar tashkiloti topshirig'iga binoan, maktabni tamomlagach — maktabdan so'ng, xizmatni o'tab bo'lgach -xizmatdan so'ng.

6-mashq. Aniqlik nisbatini majhullik nisbati bilan almashtiring. Daftaringizga yozing.

1. Meni "Fidokorlar" Milliy Demokratik partiyasiga qabul qildi. 2. 2007-yilda akamni harbiy xizmatga chaqirdi. 3. Meni harbiy xizmatga chaqirdi. 4. Anvarni Turkiyaga xizmat safariga yubordi. 5. O'rta maktab bitiruvchilarini o'qishga jo'natdilar. 6. Fakultet qisqarganligi tufayli o'qishimni Toshkentga ko'chirdim.

7-mashq. Keltirilgan so'z birikmalari ishtirokida gaplar tuzing.

"Yoshlar ishlari bo'yicha agentlik"ka a'zo bo'lmoq, ishtirok etmoq, o'qishga kirmoq, xizmatni o'tamoq, maktabni tamomlamoq, cho'pon bo'lib ishlamoq, ishchi oilasida, hozirgi vaqtda, topshirig'iga binoan, taqdirlanmoq.

8-mashq. Keltirilgan so'zlardan foydalanib, kishining kasbi to'g'risida axborot bering.

Namuna: *U iqtisodchi.*

Hisobchi, duradgor, me'mor, chorvador, agronom, tarixchi, faylasuf, o'qituvchi, muhandis, muxbir, jurnalist, to'quvchi, filolog, yurist.

9-mashq. Keltirilgan so'z birikmalaridan foydalanib, bajarayotgan jamoat ishlaringiz haqida ma'lumot bering. Daftaringizga yozing.

Namuna: *Men guruh yetakchisiman.*

Talabalar ilmiy jamiyati raisi, to'garak raisi, tahririyat a'zosi, institut "Yosh yuristlar klubi" a'zosi, talabalar uyi kengashi a'zosi.

10-mashq. Qavs ichidagi so'zlarga tegishli kelishik qo'shimchalarini qo'shing va daftaringizga yozing.

1. Men 1998-yilning 20-aprelida Surxondaryo viloyati Termiz shahrida xizmatchi oilasida tug'ildim. 2005-yildan 2014-yilgacha Termiz shahridagi 7-maktabda, 2014-yildan 2017-yilgacha Termiz davlat universiteti qoshidagi 2-son akademik litseyida o'qidim. 2. Ukam 5-(sinf) o'qiydi. 3. 2017-(yil) (Termiz davlat universiteti) (o'qish) kirdim. 4. Xizmatchi (oilasi) tug'ildim. 5. Jamoat (ishlari) ham qatnashaman.

11-mashq. Gaplarni to'liq yozing.

Namuna: *Otam universitetda ishlaydi.*

1. Men ... tug'ilganman. 2. Otam ... ishlaydi. 3. Akam ... o'qiydi. 4. ... o'rta maktabni tamomladim. 5. ... o'qishga kirdim. 6. ... a'zosiman. 7. Hozirgi vaqtda ... 8. Onam ... ishlaydi. 9. ... taqdirlandim (mukofotlandim).

12-mashq. Quyida berilgan matnni zaruriy qismlar asosida tartib bilan yozing.

Harbiy xizmatdan qaytgach, qurilish brigadasiga ishga kirdim. Tarjimayi hol. 1994-yildan 2004-yilgacha qishlog'imizdagi 76-o'rta maktabda o'qidim. 2005-yilda harbiy xizmatga chaqirildim. Men, G'aybullayev Do'styor Almatovich, 1987-

yilning 5-martida Surxondaryo viloyati Qumqo'rg'on tumani "Moybuloq" mahallasida xizmatchi oilasida tug'ildim. Maktabda sinf devoriy gazetasi tahrir hay'ati a'zosi bo'ldim. Otam – G'aybullayev Almamat Eshonqulovich, fermer xo'jaligi rahbari. 2008-yilda Termiz davlat universitetiga o'qishga kirdim. Onam – Jo'raqulova Maryam, maktabda o'qituvchi bo'lib ishlaydi. Opam Faybullayeva Lola – Bolalar bog'chasida tarbiyachi bo'lib ishlaydi. Bo'ydoqman. Ukam Farrux- 5-sinf o'quvchisi. 2008.15.09. D.G'aybullayev. Mening turar joyim: Termiz shahri, Alisher Navoiy ko'chasi, "Do'stlik" mahallasi, 5-uy.

13-mashq. Quyidagi tarjimai hol matnida tushirib qoldirilgan qo'shimchalarni to'g'ri qo'yib, daftaringizga ko'chiring.

Tarjimai hol

Men, Salimova Mohidil Jaloliddinovna, 1986-yil 10-sentabr... Termiz shahri..., xizmatchi oila... tug'il... Otam- Bahriddinov Jaloliddin, Respublika Kardiologiya markazida shifokor, onam – Faxriddinova Saida Abdurasulovna 7-bolalar bog'chasida tarbiyachi bo'lib ishlaydilar.

1993-yil... 2004-yil... Termiz shahri.. 1-o'rta maktab... o'qidim. 2004-yil Termiz davlat universiteti... Kimyo va texnologiya fakulteti... o'qish... kirdim 2008-yilda shu universitet... imtiyozli tugatib, kimyo fani o'qituvchisi diplomi... oldi... 2008 yil... Turizm kolleji... o'qituvchi... lavozimi... ishlayapman.

Jamoat ishlar... qatnashaman.

2006-yil... 1995-yil... "Yoshlar ittifoqi, 2005-yil... "Adolat" Demokratik partiyasi a'zo...

Turmushga chiqqan... Bir nafar qizimiz bor.

Mening turar joyim: Termiz shahri, Amir Temur ko'chasi, 10-uy.

2009-yil 14-yanvar

M.Salimova

Topshiriq

1. Sizga notanish bo'lgan talabaning tarjimai holini bilishni istasangiz kerakli savollar tuzing. Savollarni daftaringizga yozing.

2. Suhbatdoshingizning tug'ilgan joyi, ma'lumotini bilishni istasangiz, qanday savollarni berasiz?

3. Zaruriy qismlar asosida o'z tarjimai holingizni yozing.